

# ITANIA LIAN

Janeiru 2023



Diretor Programa nia  
mensajen

Pajina 2

Projetu Feminista iha  
Asaun

Pajina 4



OXFAM

# Ambiente foun iha oxfam

Jude Perera

Diretor Programa, Oxfam in Timor-Leste

## Loron diak, kolega sira!!!

Hau nia naran Jude Parera, hau mai hosi Sri Lanka ne'ebe koñesidu nu'udar Oseanu Indiku nia pérola (mutiara). Sri Lanka ne'e famozu tebes ho produsaun xá metan hosi sidade Seilaun ne'ebe nia gostu no nia morin ne'e uniku tebes. Tanba sempre ho hamanaasa midar wainhira hasoru ema foun, Sri Lanka hanaran 'Rai hosi oin-midar'

Hau mai ho esperensia servisu ne'ebe hahu hosi baze ne'ebe folin bo'ot tebes - liu hosi servisu ho organizasaun oin-oin antes ne'e. Hau gosta tebes ho ambiente servisu ne'ebe nakonu ho diversidade kultura ho dezafiu sira ne'ebe uniku, tanba ida ne'e mak hau hakarak tebes atu mai Timor-Leste.

Wainhira hau to'o iha Timor, iha fulan Outubru liu ba, hau senti hanesan fila-fali mai iha hau nia uma /rai rasik, tanba buat barak mak hanesan ho Sri Lanka, inklui ema sira ne'ebe amigavel. Ema nia naran no lia-fuan balun mos kuaze atu hanesan. Hau mos gosta ai-haan lokal sira iha ne'e.

Hau nia mehi ida mak atu servisu iha NASAUN BARAK iha mundu, inklui Timor-Leste tanba nia kultura no ema. liu-liu ekipa Oxfam ne'ebe amigavel no nakonu ho paixaun no komitmentu. **Hau gosta tebes ho Oxfam nia servisu iha setor dezenvolvimentu, umanitaria no espasu influensia.** Maibe fator ne'ebe interesante liu mak ekipa ne'e nia no nia parseiru sira ne'ebe forte ho nia dedikasaun no domin ba komunidade sira ne'ebe ita servisu hamutuk, nune'e hau senti kontenti no sorte tebes wainhira hola parte iha familia Oxfam iha Timor-Leste.





# Feminista iha asaun

Maria Jose de Carvalho Soares,  
Assesora ba Asuntu Jeneru no Inkluzaun

Projetu Feminista iha Asaun mak inisiativa ida ne'ebé ho objetivu suporta organizasaun feminista iha sira nia diversidade atu nune por etapa bele sai forsa ba mudansa pozitivu ba direitu feto, igualdade jeneru no hakbi'it feto, labarik feto no mos kamunidade marjinalizadu iha nivel global nian.

Oxfam iha Timor-Leste no Organizasaun internasional sira seluk hanesan Oxfam Fransa, Care Fransa, Equipop, Mediterranean Women's Fund (FFMed), XOESE (Francophone Women's Fund ka Fundus ba Feto Francophone) no mós Pan-African Women's Welfare Initiative (IPBF) ka Inisiativa Prosperidade ba Feto Pan-African nu'udar konsorsiu hodi jere programa ne'ebé hetan fundus hosi Ajénsia Dezenvolvimentu Fransa.

Iha Projetu foun ne'e, Oxfam iha Timor-Leste servisu hamutuk ho parseiru sira ne'ebé hatudu ona sira nia servisu diak nu'udar organizasaun feminista.

Organizasaun hirak ne'e mak hanesan; Community Based Rehabilitation Network Timor Leste (CBRN-TL), Empreza Diak no MANEO.

Community Based Rehabilitation Network Timor-Leste (CBRN-TL) hanesan Organizasaun Ema ho Defisiénsia (EHD) ne'ebé provadu ona esperiénsia iha advokasia kona-ba igualdade jéneru no inkuzaun sosiál liu hosi implementasaun projetu sira ne'ebé fó kbiit ba feto no

labarik-feto ho defisiénsia sira liu hosi atividade advokasia no dezenvolve kapasidade feto iha area rurál sira, promove feto sira-nia kbiit ekonómiku no igualdade jéneru no advokasia.

Tuir mak, Empreza Di'ak - hanesan Organizasaun Naun-Govermental Nasional, ne'ebé ho nia misaun mak Kria oportunidade ba povu Timor-Leste atu hadia sira-nia moris liu-husi atividade Hakbi'it Ekonomia.

Ikus liu mak Maneo - nu'udar organizasaun lokal baze iha Rejiaun Espesial Administrativa Oecusse Ambeno ne'ebé lidera hosi feto no halo servisu foku ba Hakbiit komunidade hodi hasa'e sira nia konsensia hodi respeitu direitu humanus no igualdade jeneru.

Hosi Projetu Feminista, Organizasaun feminista sei kria rede, aliansa atu promove aprendijazem, fahe konesementu oinsa atu halo asaun advokasia.

## Interese atu hatene liu tan kona-ba

### Oxfam nia estratejia Pais foun?

Bele vizita :  
<https://oxfam.box.com/s/7t1a98fs8lel2jzsyvsqzopihlsxi35f>







## Reziliente no Inkluzivu

Tinan kotuk, Paulo Neves reprezenta Raes Hadomi Timor-Oan (RHTO) no Cris Caetano hosi Oxfam iha Timor-Leste partisipa iha konferensia Ministerial Asia Pasific kona-ba Redusaun Risku Dezastre iha Brisbane. Paulo halo apresentasaun kona-ba papel organizasaun Ema ho Defisiensia nia iha efetividade iha Redusaun Risku Dezastre.

"Timor-Leste tama iha area ne'ebe risku ba dezastre naturais hanesan inundasaun, bai-loro naruk, anin boot, tasi sa'e, rai nakdoko no tsunami. Iha tinan rua ikus ne'e Timor-Leste hasoru ona inundasaun boot rua ne'ebe halakon ema nia uma, riku-soin, no ema balun to'o lakon sira nia membru familia."

"Kuandu dezastre mosu, ema ho defisiensia mak iha risku bo'ot tebes atu afeita no piór liu mak kulturamente ema ho defisiénsia sira nia kapasidade sempre minimiza hosi membru komunidade sira no hosi ema la ho defeisiensia. Ho razaun ne'e mak importante tebes hodi involve ema ho defisiensia ou organizasaun Ema ho Defisiensia hodi implementa

programa sira iha área Redusaun Risku Desastre Naturais nian" dehan Paul

Oportunidade diak tebes ba Oxfam no nia parseiru RHTO, oferese hosi Australian Humanitarian Partnership (AHP) ne'ebe mos envolve RHTO hola parte iha Komite Paiz nian ba Programa Prontu ba Desastre nian. Prezensa husi RHTO hodi servisu hamutuk ho Ajensia AHP iha Timor-Leste krusial tebes hodi asegura katak membru konsorsiu AHP nian hanesan Care International, World Vision, Plan International, Oxfam, Adra no nia parseiru hotu tuir duni standarte minimum ba inkluzau ema ho defisiensia iha implementasaun projetu.



## Lisaun hosi #COP27

**Konferensia Mudansa Klimatika iha Ejitu lori Nasaun hamutuk 190; Xefe estadu (Primeiru Ministru no Presidente) hamutuk 100 resin inklui publiku kuaze 35.000 mak partisipa hodi koalia kona-ba nasaun sira nia komitemento no responsabilidade iha krizi klimatika liu-liu asegura emisaun mundu nian la kontribui manas to'o nive 1.5 C. Oxfam nia ekipa, Lucio no Carlos hola parte iha delegasaun no fahe saida mak sira hetan durante konferensia**

Oxfam nudar parte husi delegasaun hamutuk ho Governu Timor-Leste ba partisipa COP-27 ne'ebe halao iha Sharm El-Sheikh, Egypt husi loron 6-18 November 2023. Partisipasaun ne'e hola parte iha Oxfam nia komitemento ba Justisa Klimatika liu hosi servisu sira iha asuntu Finansiamentu Klimatika, Responde Dezastre no Agrikultura Karbonu liu hosi Projetu Rai Matak.

"Iha konferensia COP27, delegasaun fahe ba ekipa 4 hodi atende asuntu spesifiku sira ne'ebe aprezenta no negosia. Asuntu espesifiku sira mak hanesan mak hanesan ekipa ba Mitiasaun, Adaptasaun, finansiamentu, lakon no estragus, generu, teknologia

no seluk. Oxfam rasik partisipa barak liu iha asuntu mitigasuan, adaptasaun no finasiamentu" dehan Lucio no Carlos.

"Iha negosiaun, nasaun ho nia dezenvolvimentu sei atrazu ka iha kotuk liu (Least Development Country/LDC) ho nasaun ilha kiik sira (Small Island Developing State/SIDS) hamutuk nu'udar aliadu bo'ot ida hodi negosia ho nasaun dezenvolvidu sira hodi Ejize komitemetu iha halibur fundu klimatika kada tinan ho montante 100 bilion ne'ebe nasaun dezenvolvidu sira tenke finansia inklui responsabiliza lakon no estragus liu husi kria mekanismu finansiamentu foun".

# Hamriik hodi kontra violensia

Joana Maria  
Gender Justice Program Officer

**Asuntu Ema ho defisiensia iha Timor-leste sei hasoru dezafiu oin-oin, liu-liu risku violensia ne'be mosu iha ambiente familia, komunidade no fatin publiku sira. Atu kria sosiedade inkluziva ba ema hotu no livre hosi violensia, Rede Rehabilitasaun baze komunidade ka ho sigla ingles CBRN-TL hamriik hodi promove partisipasaun ema hotu nia inklui feto, foinsa'e no labarik feto ho defisiensia, sira iha prosesu dezenvolvimentu nasional.**

Norberta Soares, Diretora CBRN-Timor-Leste haktuir katak wainhira harii iha tinan 2014, CBRN-TL nu'udar Organizasaun Nasional ba ema ho defisiensia nebe servisu iha area Rehabilitasaun ho baze komunidade ka CBR (Community Based Rehabilitation), no hanesan mos membru ida husi Rede Reabilitasaun Baze Komunitaria Azia-Pasifiku (CBRN-AP). Oras ne'e, ema nain 15 mak hola parte ona iha ekipa ida ne'e, no maioria hosi sira mak Feto no ema ho defisiensia.

"CBRN-TL foku ba asunto Ema ho defisiensia liga ba Prevene Violensia bazeia ba jeneru hasoru feto no labarik feto ho defisiensia no promove servisu Community based Rehabilitation (CBR) iha Timor Leste ho inkluzivu. Wainhira simu kna'ar nu'udar Diretora, ba dahuluk hau senti la'os kontenti, maibé hanesan parte ida atu dezafia-aan ho responsabilidade ne'be bo'ot no liu-liu iha periodu ne'be CBRN Timor-Leste rasik bele dehan foun liu iha mundu organizasaun nia" dehan Norberta

CBRN-TL nia Misaun mak atu kria sosiedade ida-ne'ebé inkluzivu ba ema ho defisiénsia sira. " Ami hala'o ona atividade sira hanesan; Fahe Informasaun liu hosi Sosializasaun no Treinamentu konaba asunto ema ho defisiensia liga ba prevene Violensia hasoru feto no labarik feto ho defisiensia iha Timor Leste; Peskiza konaba situasaun ema ho defisiensia asesu ba servisu publiku, no mos Advokasia kona-ba Direitu ema ho defisiensia iha programa Dezenvolvimentu sira ho inkluzivu ba ema ho defisiensia



Hatene liu tan CCBN-TL nia atividade sira iha pájina Facebook  
ofisiál : <https://web.facebook.com/cbn.timorleste>



# Parseria hodi hamatak mundu

Ross Merry da Gloria  
Kordenadora Komunikasaun

**Projetu Rai Matak iha Viqueque lori ona Amelia no Francisco hola parte iha asaun reflorestasaun hodi kuda ai iha sira nia to'os no hetan rendimentu hosi kada tinan hodi apoiu ekonomia familia**

Hau nia kabem ho hau sempre servisu hamutuk. Hau nunka hare nia hanesan ema ho defisiensia ida, nia bele. Nia bele halo servisu saida deit, ami ba to'os hamutuk, ami kuda no rega ai sira. Ami servisu hamutuk" dehan Amelia hosi munisipiu Viqueque, suku Maquedique.

"Ami rona informasaun kona-ba Projetu Rai Matak dezde tinan 2021 liu ba. Ema hotu ko'alia kona-ba Rai Matak iha fatin hotu-hotu. Ami rona oinsa projetu ida ne'e nia lalaok, interesante, tanba ami iha rai ne'ebe luan no bele kuda ai sira no kuda nafatin modo sira besik, no bele hetan rendimentu kada tinan".

Agora, Amélia no nia kabem kuda ona ai-teka hamutuk 400 iha sira nia to'os laran. "Ami konsiente katak tempu agora ne'e la hanesan uluk; udan no rai maran mai la tuir ona nia tempu, no afeta tebes ami nia ai-horis sira iha to'os laran". dehan Amelia

"Ami kontenti tebes tanba ai-teka ne'ebe ami kuda ona, ajuda tebes ami no ekipa Rai Matak mos dehan katak ho kuda ai-teka sira ne'e, ajuda ona rai ne'ebe ita hela atu forte liu tan hasoru dezastre naturais ne'ebe akontese".



Foto: Ross Merry da Gloria / Instituto Lekale  
Município de Viqueque

# Forte no preparadu liu tan

Cris Caetano

Resilience Program senior manager

**Iha Abril tinan 2021 liu ba, Cyclone Seroja akontese iha illa Timor no afeta kuaze teritoriu tomak iha Timor-Leste, inklui tia Agusta hosi suku Lahane Oriental, Dili, ne'ebe nia uma hetan estragus no lakon mos sasan sira**



Wainhira inundasaun bo'ot invade sidade Dili no munisipiu seluk iha loron 4 fulan Abril madrugada, tia Agusta no nia familia tenki evakua no muda ba tenda kiik ida, tanba kondisaun uma ne'ebe nia hela dezde tinan 75 liu ba, ne'e la seguru ona ba sira. Hafoin akontesimentu ne'e, tia Agusta kontinua hela iha tenda durante tinan ida nia laran.

Iha Janeiru tinan 2022, Oxfam iha Timor-Leste no Ra'es Hadomi Timor-Oan no Autoridade Protesaun Sivil, servisu hamutuk hodi foti dadus komunidade no ema ho defisiensia sira ne'ebe afetadu hosi cyclone ne'e.

Iha uma ne'ebe kompostu hosi kuartu rua ne'e, tia Agusta hela hamutuk ho oan no bei-oan sira ne'ebe ho idade sei kiik tebes.

"Hau kontenti los tanba uma ne'e hadi'a hikas fali ona, ho ajuda hosi enjineiru no enjineira sira, nune'e ami hela ho seguru ona kuandu udan bo'ot mai fali. Rampa ne'e mos ajuda tebes hau ho hau nia kondisaun defisiensia matan".

Ho projetu #BuildBackBetter ne'ebe finansia hosi Australian Humanitarian Partnership, tia Agusta nia uma renova ona ho rampa ne'ebe halo uma ne'e sai asesivel liu tan.

# Luta ba Timor ne'ebe inkluzivu liu

Adilsonio da Costa Junior  
Strategic and Engagement lead

**Konvensaun ba Direitu Ema ho Defisiensia ikus mai ratifika duni iha Timor-Leste hafoin luta naruk no tempu ne'ebe la'os lalais. Rezultadu ne'e la sees hosi Organizasaun Sosiedade Civil sira, inklui Organizasaun Ema ho Defisiénsia no mós Grupu Promotor sira nia papél iha servisu advokasia no halo influensia ba órgaun estadu sira**

Iha fulan Julu 2022, Parlamentu Nasional apresenta votus unanimidade hodi aprova proposta rezolusaun rua hanesan; Adezaun ba Ratifikasiun Konvensaun Internasional Direitu Ema ho Defisiensia no Ratifikasiun ba opsaun protokolu ba Konvensaun Ema ho Defisiensia, nune'e Timor-Leste prontu ona hodi sai estadu membru ba konvensaun ida ne'e.

Hamutuk ho parseiru no aliadu sira, Oxfam hola parte kampaña oin-oin ne'ebe organizasaun sosiedade civil, organizasaun Ema ho Defisiensia no Grupu Promotor rasik liu hosi enkontru formal no informal ho reprezentante órgaun soberania sira, organiza programa TV talkshow, hakerek paresér ka Submisau, halo konferénsia da imprensa, inklui mós uza media sosiál sira hodi halo kampaña no mós meius komunikasaun sira seluk atu eziej no husu ba governu hodi ratifika no lori estadu Timor-Leste atu sai parte ba paktu internasionál ida ne'e.

liu hosi projetu Open the Books ne'ebe hetan apoio finansimentu husi Australian NGO-Cooperation Partnership (ANCP), Oxfam iha Timor-Leste ho Parseiru sira hanesan Asosiasaun Defisiénsia Timor-Leste (ADTL), Ra'es Hadomi Timor Oan (RHTO), Core Group



Transparency (CGT) no Grupu Promotor sira kontente tebes ho esforsu tomak no atinzimentu ida ne'e, Oxfam no parseiru OtB mós kongratula ba komitmentu no esforsu tomak husi Governu no Parlamentu Nasional hodi ratifika konvensaun ida ne'e, nune'e ita hotu espera katak Timor-Leste ne'ebé daudaun ne'e sai estadu parte ba konvensaun ida ne'e sei kontinua hala'o sira nia komitmentu hodi implementa konvensaun ida ne'e ho lolos iha futuru liu husi planeamentu, programa no investimentu orsamentu ne'ebé adekuadu nune'e bele responde ba nesesidade no hakonu direitu Ema ho Defisiénsia sira nian iha Timor-Leste.

# SURA HO HAU IHA ORSAMENTU JERAL ESTADU 2024



“Orsamentu Estadu 2024  
Ne'ebé Sensivel No  
Inkluzivu Ba Ema Ho  
Defisiénsia Mak Sasukat  
Ida Hodí Atinji  
Dezenvolvimentu Inkluzivu”

#SuraHoHauhaOrsamentuEstadu2024  
#DezenvolvimentuInkluzivu



# Politika nasional ne'ebé sensivel

Adilson da Costa  
Strategic and Engagement lead

Oxfam iha Timor-Leste ho nia parseiru liu husi projetu Open the Books, ne'ebé inklui Asosiasaun Defisiénsia Timor-Leste (ADTL), Ra'es Hadomi Timor-Oan (RHTO), Core Group Transparency (CGT), Grupu Promotor no mós ekipa assessor tékniku ba asuntu Ema ho Defisiénsia no Inkluzaun husi CIP (Centre for Inclusive Policy) husi India no CBM husi Australia, hasoru malu ho Ministru Obras Públika (MOP) ho nia ekipa.

Enkontru ida ne'e ko'alia kona ba asuntu asesibilidade infrastrutura públiku ba Ema ho Defisiénsia iha Timor-Leste, inklui mós asuntu Orsamentu Estadu ne'ebé bazeia ba Direitu Ema ho Defisiénsia nian. Iha oportunidade ne'e Exelénsia Ministru Obras Públiku Sr. Abel Pires konkorda tebes ho servisu ekipa husi OtB nian ne'ebé durante ne'e halo servisu kampaña no influensia ba asuntu asesibilidade infrastrutura públiku ba Ema ho Defisiensia, Orsamentu ne'ebé Inkluzivu inklui mós ratifikasišun Konvensaun Internasional ba Direitu Ema ho Defisiénsia nian no oinsá ninia implementasaun iha futuru.

Sr. Ministru Abel sujere katak asuntu asesibilidade ba Ema ho Defisiensia la'ós deit governu mesak mak halo maibé tenke mai husi Organizasaun Ema ho Defisiénsia sira hodi hala'o asesmentu no relata mai MOP no nia konfirma katak sura ho nia iha servisu kampaña no advokasia iha nível politika. Nune'e, iha futuru asuntu asesibilidade infrastrutura públiku ba Ema ho Defisiensia bele kontinua integra iha ministériu sira seluk nia planeamentu no dezeñu infrastrutura sira.





# Justisa ba Rai, Agora!

Zeca Nunes  
Land Program Coordinator

Oxfam no Rede ba Rai no membru sira fasilita dialogu nasional entre komunidade ho governu kona-ba impaktu dezenvolvimentu sira ne'eb'e afeita komunidade nia rai no hela fatin, no governu seidauk responde durante tempu naruk, hanesan projeto ZEESM, Suai Supply Base iha Tasi Mane, Sidade universitariu Aileu, konstrusaun no alargamentu aeroportu Dili, no kazu sira iha munisipiu seluk.

Objetivu husi dialogu ida ne'e mak Komunidade afetadu sira liu-liu feto, mane no ema ho defisiénsia sira iha espasu atu hato'o ba autor foti desijaun sira kona ba sira nia preokupasaun no direitu sira ne'ebé durante ne'e governu seidauk hakonu mak hanesan direitu ba indemnizasaun ne'ebé justu bainhira mosu expropriasaun ba sira nia rai, plantasaun no hela fatin.

Aleinde ne'e, liu husi espasu dialogu ida ne'e, komunidade afetadu sira mai ho deklarasaun no rekomendasaun konjunta ida ba governu hodi trasa politika ida ba defende komunidade sira nia direitu ba rai nomos halo konsultasaun publiku ida ne'ebé klean no envolve komunidade afetadu hotu-hotu, molok expropria sira nia propriedade tuir prinsipi no prosedimentu legal sira ne'ebé temi iha Lei Rai nu 13/2017 no Lei Espropriasaun nu 8/2017.

Bazeia ba rekomendasaun sira ne'e, governu liu husi Ministeriu Justisa, Parlamentu Nasional Komisaun A nomos Presidensia Republika konsidera preokupasaun komunidade sira nian, no sei relata ida ne'e ba iha konsellu ministru hodi buka soluasaun, liu-liu kazu rai no direitu ba indemnizasaun justu ba komunidade sira iha RAEOA. Liu husi oportunidade ida ne'e, komunidade afetadu sira husi Oecuse, Suai, Ainaro, Same, Baucau, no Dili senti orgullo ba Oxfam ho nia parseiru sira hanesan Rede ba Rai no JA ne'ebé ajuda no fasilita ona espasu ida ne'ebé diak ba sira hodi ekspresa direita sira nia preokupasaun sira, tamba durante ne'e laiha espasu ba sira atu koalia.

**#JustisaBaRaiAgora!**



# MINISTÉRIO DA JUSTIÇA



# Projetu Prontu ba Dezastre 2.0 lansa ona

Cris Caetano  
Resilience Program Senior Manager

Projetu Prontu ba Dezastre 2.0 hanesan kontinuasaun hosi Projetu Prontu ba dezastre dahuluk ne'ebe termina ona iha loron 30 fulan Junu tinan 2022 liu ba. Projetu nia kontinuasaun ba tinan 5 oin mai (2022-2026) parseria entre Governu Australia no Organizasaun Sosiedade Civil sira hosi Australia, hanesan Oxfam, Care International, Plan International, Caritas no World Vision. Objetivu hosi Programa ne'e mak ema hotu, liu-liu maluk feto sira, foinsa e, labarik, ema ho defisiensia no grupu vulneravel seluk, iha atividade Prontu ba Dezastre, Preparasaun ba Dezastre no mitigasaun.

Oxfam iha Timor-Leste sei implementa programa ne'e liu hosi servisu hamutuk ho parseiru nain 6 hosi organizasaun lokal sira, hanesan Kdalak Sulimutu Institute, Matadalan Institute, MANEO, A-FFOS, BIFANO no Ra'es Hadomi Timor-oan (RHTO) iha munisipiu 4, hanesan Dili, Ermera, Likisa no Oecusse, iha postu-administrativu 7, no suku hamutuk 22 no aldeia hamutuk 61.

Programa ne'e mos sei kolabora ho parte interesadu sira hanesan sekretariu estadu Protesau sivil, linha ministeriais relevante sira, autoridade munisipal, hanesan komisaun jestaun dezastre nivel suku, inklui ajensia ONU nia ne'ebe relevante



# Loron mundial umanitaria

#LoronUmanitáriu2022 ne'ebe monu iha loron 19 fulan Agustu, marka asaun ba mudansa klimátika nu'udar dezafiu globál nia hodi fo solidáriu ba ema sira ne'ebe enfrenta krize

Projetu Uma Inkluzivu #BuildBackBetter apoiu ona komunidade ne'ebe afetadu hosi Siklone Seroja ne'ebe akontese iha loron 4 Abril 2021 hodi rekopera no #PREPARADU wainhira dezastre mosu. Total uma ne'ebe harii hikas fali hamutuk 15, ho apoiu hosi Governu Nova-Zelandia no mos Governu Australia.

Susesu hosi Programa ne'e la sees hosi papél importante ekipa enjeñaria Oxfam nia hanesan maun José no mana Silvia no enjeñeiru sira seluk ne'ebe envolve iha prosesu Dezeñu, superviziona no kordena ho parseiru xave sira hanesan Ra'es Hadomi Timor Oan- no Diresaun Geral Protesaun Sivil hodi asegura komunidade aproveita ona #UmalInkluzivu no Reziliente.

#LoronUmanitariu2022

#OxfamTimorLeste

#HarriDiakLiu

#UmalInkluzivu

#Asesibilidade



# Kalendariu Eventu Tentativu

Janeiru-Juñu 2023

- Workshop Hare rekomendasaua inklusaun husi CBM ba parseiru Hakbiit RHTO (Oxfam ho RHTO) - Marsu
- Treinamento PSEAH ba parseiru Hakbiit hotu (Oxfam)-Marsu
- Workshop ba parseiru Hakbiit hotu, hosi EQI konaba envolve mane iha programa - Marsu
- Lansa relatoriu no workshop ho stakeholders sira konaba servisu tau matan nebe la selu / Unpaid Care Work iha Dili - Maiu
- ToT konaba Numerasia no Literasia ba parseiru Hakbiit hotu iha Dili (lidera husi Empreza Diak)- Maiu-Juñu
- Reflesaun Te kete Kotui (finansiamentu klimatika & Feto no rai) -parseiru hotu-hotu - Marsu
- Workshop Finansiamentu Klimaitka - Marsu
- Treinamentu Asuntu Ema ho defisiensiua ba parseiru Finansiamentu Klimatika - Maiu
- Treinamentu asuntu jeneru ba parseiru finansiamentu klimatika - Maiu
- Treinamentu : CBDRM (Community based Disaster Risk Management) iha suku 4 - AFFOS & BIFANO (Marsu-Juñu)

# Kalendariu Eventu Tentativu

Janeiru-Juñu 2023

- Treinamentu: Feto iha Lideransa iha suku 7 - MDI, AFFOS and BIFANO (Marsu-Juñu)
- Monitorizasaun Eleisaun Parlmentar - ADTL (Marsu)
- Enkontru Regular Programa Open the Book - ADTL (Marsu-Abril)
- Analize Orsamentu Jeral 2024 - Marsu (CGT)
- Dialogu Partidu Politka ba asuntu Orsamentu Jeral 2024 - CGT (Marsu)
- Kampaña Media (CGT) - Marsu
- Reflesaun Projetu Open the Book - Parseiru hotu (Juñu)
- Treinamentu ba Focal point/Embaixador Asuntu Ema ho Defisiensia - Lidera hosi RHTO, no kolabora ho ADTL, CGT & Oxfam (Marsu-Abril)
- Audensia ba nivel foti desizaun sira - RHTO, kolabora ho CGT & Oxfam (Marsu-Abril)
- Organiza Workshop ba membru Parlamentu Nasional konaba asuntu Defisiensia - RHTO, kolabora ho ADTL, CGT & Oxfam (Marsu-Abril)
- Selebrasaun Loron Feto Mundial - Parseiru hotu Rai Matak (Marsu)
- Treinamentu Salvaguarda - HMI, CCC, NETIL (Marsu)
- Treinamentu GALS - Timor-Verde (Marsu)
- Reflesaun Anual Projetu Rai Matak - Parseiru hotu (Maiu)

# Akrónimu

AHP : Australian Humanitarian Partnership

CEDAW: Committee on the Elimination of Discrimination against Women

CRPD : Convention on the Rights of Persons with Disabilities

CBRN-TL : Community Based Rehabilitation Network Timor Leste

DRP : Disaster READY Program

DFAT : Department of Foreign Affairs and Trade

EhD : Ema ho Defisiensia

EU : European Union

FONGTIL : Forum ONG Timor-Leste

GALS : Gender Action Learning System

GfD : Governance for Development

HMI : Ho Musan ida

KSI : Kdadak Sulimutuk Institute (KSI)

MFAT : Ministry of Foreign Affairs and Trade

OfTL : Oxfam in Timor-Leste/Oxfam iha Timor-Leste

OTB : Open the Book

OSS : Organizasaun Sosiedade Civil

RAEOA : Rejiaun Administrativa Espesial Oe-Cusse Ambeno

RHTO : Ra'es Hadomi Timor-Oan

SRA : Sentru Rekursu & Advokasia

ZEESM : Zonas Especiais de Economia Social de Mercado de Timor-Leste

SUPPORTA HOSI:



THE GLOBAL CLIMATE CHANGE ALLIANCE PLUS INITIATIVE



Funded by  
the European Union





Oxfam iha Timor-Leste  
Avenida Hudi-Laran  
Dili, Timor-Leste  
+670 3312605  
+670 77230831



OXFAM